

共同經課 - 1 出埃及記一章八節~二章十節

8 埃及有新的王興起，唔識約瑟的，9 伊對伊的百姓講：「看啊，此個百姓以色列人比咱卡多，卡強。10 來啊，咱著用計策來款待in，驚了in加添真多，後來若抵著交戰的事，in及咱的對敵聯合來攻擊咱，閣對此個地上去。」11 對按呢設立督工者管轄in，用重擔苦楚in。in就給法老起比東、蘭塞二個城，做府庫。12 總是愈苦楚in，in愈多愈開闊；對按呢就為著以色列人掛慮。13 埃及人就督責以色列人做苦工，14 互in做工著磨生活艱苦；搏土做磚，及作田裡許個工，佇一切所做的工無唔是真嚴。15 有希伯來的拾姐母，一個名施弗拉，一個名普阿；埃及王對in講：16 「恁給希伯來的婦仁人拾子，看in臨盆的時，若是查甫囡仔，著互伊死；若是查某囡仔，通互伊活。」17 總是拾姐母敬畏上帝，無照埃及王的命令來行，竟然留查甫囡仔的活命。18 埃及王就叫拾姐母來，對in講：「恁啥事按呢做，留查甫囡仔的活命？」19 拾姐母對法老講：「希伯來的婦仁人及埃及的婦仁人無同；in卡快便，拾姐母猶未到，in已經生了。」20 上帝好款待拾姐母。百姓加添真多，極其強盛。21 拾姐母因為敬畏上帝，上帝就互in成家。22 法老吩咐伊的眾百姓講：「凡所生的查甫子，恁著給伊穴落河；一切的查某囡仔，恁著留伊的生命。」1 有一個利未族的人去娶一個利未族的查某囡仔。2 彼個婦仁人懷孕，生一個子，看見伊是清秀的囡仔，就囡伊三月日久，3 後來看袂閣得，就為著伊取蘆竹仔的箱，用石油及瀝青糊伊，將囡仔下佇彼內面，橐佇河邊蘆葦的中間。4 伊的大姐遠遠倚啲，愛知伊會抵著怎樣。5 法老的查某子落來河裡欲洗浴，伊許個女婢行遊佇河邊。伊看見蘆葦的中間有箱，就差一個女婢奔來。6 掀開，看見囡仔。看啊，囡仔啲啲，伊就憐憫伊，講：「這就是希伯來人的囡仔。」7 伊的大姊給法老的查某子講：「我去佇希伯來婦仁人的中間叫一個奶母，給你育此個囡仔，好嗎？」8 法老的查某子給伊講：「你通去啊！」查某子就去叫囡仔的老母。9 法老的查某子給伊講：「抱此個囡仔去，給我育伊，我欲互你工錢。」婦仁人就抱囡仔去育伊。10 囡仔漸漸大，婦仁人就帶伊到法老的查某子遐，做伊的子。伊給伊號名叫摩西，講：「因為我對水裡救伊出來。」

共同經課 - 2 詩篇一百二十四篇

1 〔上崎仔的詩，大衛所做。〕以色列今著講：若唔是耶和華助阮，2 若唔是耶和華助阮，佇人起來攻擊阮，3 佇in對阮發受氣的時、就將阮活活吞落去。4 彼時，諸個水的確搬(pôaⁿ)過阮，河水的確淹密阮，5 兇狂的水的確淹密阮。6 願耶和華受謳嘍！因為伊無將阮做食物交互in哺食，7 阮的生命親像鳥仔，脫離掠鳥的羅網；羅網破裂，阮就脫離。8 阮得著幫助，是靠耶和華的名，伊是創造天地者。

共同經課 - 3 羅馬書十二章一節~八節

1 兄弟啊，所以我因為上帝的憐憫勸恁獻家己的身軀做祭，是活的，聖的，上帝所歡喜的；這是恁神靈的服事。2 莫得及此世間像款，著用心志換新來變化家己，互恁會明白甚麼是上帝善良、通歡喜、純全的旨意。3 因為我對所互我的恩給恁中間逐人講，恁所想來忖度家己，唔通搬(pôaⁿ)過佇應該想的；所想著安份來想，照上帝所賞賜逐人信的份量。4 因為親像咱一身有百體，若是百體的功用無攏相同；5 按呢咱多多人恁佇基督做一身，逐個相共做體。6 咱照所互咱的恩，已經得著恩賜，各無相同。或是做先知，就著照信的份量來講，7 或是辦代誌，著致意佇辦代誌；或是教示人的，著致意佇教示；8 或是勸勉的，著致意佇勸勉；調助的，著用實心；治理的，著用殷勤；憐憫的，著用歡喜。

共同經課 - 4 馬太福音十六章十三節~二十節

13 耶穌已經到該撒利亞腓力比的境界，問伊的學生講：「人啲講人子是是誰？」14 in講：「有的講是行洗禮的約翰；有的講是以利亞；閣有的講是耶利米抑是先知人的一個。」15 伊就給in講：「若是恁講我是是誰？」16 西門彼得應講：「你是基督，真活上帝的子。」17 耶穌應伊講：「西門巴約拿，你有福氣啊！因為血氣肉體的無指示你，就是我佇天裡的父指示你。18 我閣給你講，你就是彼得，佇此個石盤頂我欲起造我的教會；陰府的關隘也袂贏伊。19 我欲用天國的鎖匙互你，見若你佇地裡縛的，佇天裡亦欲縛伊；見若你佇地裡放的，佇天裡亦欲放伊。」20 彼時，就禁戒學生，莫得給人講伊是基督。